

營田輯要

營田輯要敘

去歲余客皖議者多言興屯田余謂屯田非今便而招徠流亡墾種荒畝則今日之急務其要在於慎選牧令聞者避之今金陵告克大江南北及全浙東西旣就底定而數年來糜爛幾徧之秦中幸亦無賊擾則正招徠墾種冀拯殘黎於塗炭之餘矣顧行之之法與所以行之之弊又賴有心斯世者爲之熟籌深慮以求有利無患焉貴筑黃琴塢先生示余以所纂營田輯要一書意在用民而不用兵與鄙言合其書

凡言成法十有七言積弊十有四於制田物土之宜又博採而詳言之皆集前人成說著於篇使人自酌而不參以已論蓋兢兢焉述而不作之意故曰述也夫寇亂之後民之元氣傷亦甚矣譬如人之身久病尪瘠僅而獲生必得淺苓良劑滲漚佳羞以滋培之庶可冀其充復而不至於復病且死今大亂漸平爲民上者欲拊未死之孑遺保已復之曷土使凋殘之極元氣漸復則舍招墾顧何所策欲議招墾而不取良法去積弊則又烏以有濟於國而便於民此

先生積不容已之故而有是編之輯也抑又嘗疑招墾之令必使避難之氓歸其本鄉歸稍遲則田產歸公所慮者榜諭於本籍遠徙之民不能遽知既知亦不能遽歸及其歸也則無室可棲無田可耕訴之官官又以無契券踰期限斥之嗟此殘黎遂有率妻子填溝壑者今讀是編於部例定限五月之外復有舊主新募分租酬值及斷限二年三年之制可不謂仁厚之至乎顧其中紛糾瑣細剖析調劑非以已心體民隱治民事如家事之賢有司起而任之事必不辦

夫有治人無治法法具而尤賴人以濟之也昔陳文恭公有言曰平生於富貴利達不肯著熱於國計民生不肯放冷未必事皆有濟而此心自不容已瑤嘗服膺斯言喜爲儕輩稱述先生浮沈郎署至久旣一官出外旋棄去老作寓公蕭然塵外而其心若未能一口忘天下殆庶幾文恭之所語故序是編輒復津津誦之使世之覽者知是書之作蓋於國計民生實有不容已之故云同治三年十有一月新化鄧瑤伯昭謹敘

營田輯要敘

營田輯要者黃琴臨年丈所編次也綜歷代規畫議  
論詳著之篇篇分內外內篇又自分上下卷半言法  
半言弊爲目者三十有一外篇則附載制田種植等  
事卷首冠以通論度方今時勢謂民耕勝於兵耕待  
推行者擇而用之大旨取述而不作然亦時露微意  
焉編成命柏心序諸首簡竊謂茲事體大益軍國甚  
鉅前代行之成效彰彰非蒙所敢置議也然嘗求其  
端矣自鼂錯建策募民耕塞下爲屯田之始趙充國

將吏士屯田湟中則屯而兼營矣後世行營所在率仿屯田亦曰營田大意相類特耕有民與兵之異前明別置軍衛就衛立屯則專主漕運而已要而覈之其爲田不同有在邊地者如兩漢之輪臺西域唐自振武雲中至中受降城是也有在腹地者如東祇任峻鄧艾屯陳許淮潁之田何承矩李允則屯滄景雄州之田是也其爲耕亦不同有募土人及謫戍卒人矣有將與卒分田而治矣夫田於邊地奪彼肥饒取我曠棄以資戰守以省轉輸利爲上田於腹地必我

強於彼兼有賢將且耕且戰乃得積聚利爲次將卒  
並耕殖穀必廣一遇寇警或燒或芟則得失常相半  
也徙民往耕足以供軍室廬牛種事須官給則勞費  
不勝計也大約行之軍爭之秋良將禦於外良吏督  
於內事權一而思慮精則弊不敵利行之無事之際  
冗蠹熾於前廢削乘於後文法多而曠怠啓則利不  
敵害此其大較也今者寇難略平兵燹蹂躪之區死  
傷流亡靡有孑遺三秦兩淮間往往數百里爲邱墟  
皆曩日膏腴上產也此非議興營田之時乎顧言之



甚易行之甚難何者限田定賦法立弊生有經界川渠城堡井竈田器倉庾之役有守望追胥獄訟簿書之役有拊循安集勸課督促徵斂之役凡此非賢能吏莫能任況猶有阻撓牽制之相隨也乎又有甚者急近功務紛擾貪浮賦張虛額恐良法適以厲民世且謂營田不可復行將奈何不知其要惟在得人而已夫營田之善不傷財不擾民無曠土無遺利其濟軍國甚鉅方今時勢尤易舉行賢於按稅算緡遠矣是編蓋再三致望焉誠繹其微意得人以任之有百

利無一害也明甚故曰藥一也或以延年或以速斃  
車一也或以致遠或以僨輓雖有治法尤貴治人獨  
營田也乎哉年家子監利王柏心敘

營田輯要目錄

卷首

總論

內篇上

成法

榜諭

核田

勘丈

招墾

附禁墾

授田

附田帖

限期

牛種

富民

專官

築堡

設長

附保甲

社倉

社學

起科

附免科

丁徭

任人

守法

勸懲

內篇上之下

成法

水利

總論南北水利  
東南水利  
西北水利  
水利之益  
水利之難  
水利考成

內篇下

積弊

不清其源之弊

不務其實之弊

輕委之弊

推諉之弊

勘丈之弊

姦民猾吏之弊

里長糧差之弊

賞田官田之弊

捏報墾荒之弊

私售營田之弊

私售營田之弊

土客不安之弊

田賦不均之弊

喜事畏事之弊

期效太促任人不專之弊

外篇

附考

尺度

闢荒

制田

隄堰

溝洫

鑿池

穿井

糞田

播種

種法

種蔬



雜植

營田輯要目錄終

營田輯要目錄

營田輯要卷首

貴筑黃輔辰述

總論

屯營一也。然屯田因兵得名。則固以兵耕。營田募民墾種。分里築室以居其人。略仿晁錯田塞之制。故以營名。其實用民而非兵也。唐開軍府以捍要衝。因隙地而置營田。設農寺之善農者爲屯官。屯副視地之良薄。與歲之豐凶。爲三等。歲獲多寡。取中熟爲率。收多者。裒進之。元和中。李絳請開營田。乃以韓重華爲

東西營田使募人墾田三千八百餘頃。歲收粟二十萬石。皆用民者也。宋初。惟河北屯田以兵。若江浙闕名屯田者。皆因五代舊名。其實皆用民。神宗四年。河北屯田司屢言豐熟。其取入究亦不償。詔沿邊水陸悉募民種。收其兵爲州廂軍。慶厯間。歐陽修募弓箭手於河東。招至者未安其業。又責其借力於公田。卒以人心易搖。亦莫之行。兵不如民。由來舊矣。乃咸平中。襄州營田旣調夫。又取鄰州之兵。而熙豐間。復有營屯不限兵民之制。遂使兵民參錯。或以侵占民田。

爲擾或以差借耨夫爲擾或以諸郡括牛爲擾或以  
軍士不習耕耨不服水土爲擾至於歲入不償所費  
因而報罷蓋兵與民之不能相雜其勢有必然者何  
以知其然也屯法之善莫如趙充國諸葛亮充國所  
屯皆羌戎故疆未墾之地用步卒萬二百八十一人  
民不與焉五丈原之屯秦隴階文之間地廣人稀本  
羌胡之所棄其屯渭濱者不過畸零散布故民情安  
堵大率守邊備塞老敵情而攻堅壁以守爲本以戰  
爲心但有屯田則雖經年屢月軍食無虞且兵不耕

則不得食處無可如何之地迫以不得不然之勢勒以軍制收利一時則士馬可以壯飽騰之氣然兵罷則屯亦罷一散而不可復收矣明代就屯立衛非爭戰之時俾其且耕且守有備無患其制邊方以三分守城七分屯耕內地以二分守城八分屯耕列代相承立法詳備嬉恬既久法漸廢弛守邊將吏復請官田以自便由是膏腴在官而瘠薄歸軍官享其利而軍受其賤賦重不堪則欺隱挪移賄賣飛詭分攤包賠誣陷牽引之弊不勝枚舉從前衛所之軍不無業

田之民然民自爲民軍自爲軍分而二也乃軍田有私售於民者民或轉售於民復質於軍者輾轉授受蔓引愈長向使軍民之田經界旣正限制綦嚴則統於軍統於官有條不紊何至有難結之局哉溯自兵農旣分兵之待食於農非一日矣驟令負戈而兼操耒耜匪特身所不習心所未安甚或引以爲恥故兵與兵屯猶不免有雇替以圖便逸其平日驕惰之習漬染已深耳若夫民固生長於農者也即使身無半畝而終歲傭力於農田身親乎農事燥溼剛柔水耕

火釋不待教而知亦習焉而不知其苦也。今各直省被兵之地或數百里墟無人煙膏腴之田鞠爲茂草本著土戶悉已逃亡而予遺之民又無室家之可歸待轉死於溝壑心計之士碩畫之臣思所以救殘黎弭後患行之既久復可任以守疆土裕國用莫如講求營田之法以收無窮之地利而繫易失之人心舍是不圖而別求煥休之方或轉謂多事不如省事非所以爲國家深謀遠慮計長久也。顧未墾之前難於慮始既墾之後難於圖終固非鹵莽滅裂者所可將

事。爰攷歷代營田。搜理舊章。尋求利弊。酌平時宜。並采農書之切要者。輯爲是編。以待任事者之講求。修復焉。昔人謂天下無難舉之功。存乎其人而已。謂後人之事。必不能過前人者。不亦誣乎。夫事本待人而任。不得其人。則不可得而行。得其人矣。而清議或起於嫉忌。責效或甚於追呼。更或十羊九牧。意見各殊。朝令暮更。信任未篤。則亦終莫舉焉。



營山輯要卷首

營田輯要內篇上

貴筑黃輔辰述

田久荒則穀貴貴則民散而兵弱地闢耕廣則穀賤賤則人聚而國強漢唐以來善爲持久之計者莫如招墾大難初夷闢田尤廣聚人阜財當務爲急良法美意歷代具詳因時制宜在憂國者虛衷采擇輯成法

榜諭

明初宜興知縣陳開荒事前奉詔書積荒拋荒田地

所在官司須出榜招募。隨出榜諭。先令里長開報某田若干。及荒蕪情由。卽隨地踏勘。每里要公直人。隨同勸墾。報明籍貫姓名丁口。查無混冒。除力能自墾之家。其乏牛具米糧。設法籌貸。限收成歸還。每戶給帖。逐一載明。將前項所招之民。所墾之田。注簿存查。隨時轉報上司。俾永執業。如有豪強之爭。治以強佔之罪。其續有荒地。願復業承墾者。一體照行。宣興縣志

皇朝經世文編

核田

唐順之有言方田之法不難於量田而最難於核田蓋田有肥瘠難以一概論須於未丈之前先核一縣之田定爲三等必得其實然後丈之乃可用折兌法定畝如周禮一易之田家百畝再易家二百畝三易家三百畝此爲定畝起賦之準不先核其等差非均平之道也至於丈量具之九章算法中須先自明此意乃可付之他人之手

文集答施武陵書

**又**有地本磽确而勤民以有餘之力水耕火耨幸歲之穰而薄收者有谿江洲渚乍涌爲邱危岸窮崖將

傾未圯。目前之鱗次相仍。他日之沈圯不保者。亦有  
昔屬一家。今分數主。割留橫亘於山隈水曲。而不可  
分疆場者。若此之類。必欲持一畫定之溝封。以悉索  
而徵及毫釐。李悝之盡地力。用此術也。爲君子儒。以  
仁義贊大君之德政。其忍之乎。王夫之宋論

**又**農人擇田而田。田者擇種而種之。豐年必得粟。說

苑其耕耨之異。宜燥溼之殊性。故非老於農者。不知

儲方慶荒田議

膏腴之地。招墾易舉。至於不成片段。

卽成片段。不能引水灌溉。水邊河尾。人力可以挑培。

而不能必其有收。皆宜核實。

楊應琚開荒議

凡此等

田多與之墾而少定其科。卽年歉亦有收穫。於民生實有神益。然非地方官親勘檢核。止憑里甲等混冒殊失營田之本意。

楊永斌墾荒疏

陸隴其論直隸墾

荒。北地土荒熟不常。近山者砂土參半。遇雨方可耕種。近水者水至則一片汪洋。一報墾種。轉瞬起科。一成不易。小民視開墾爲畏途。竊謂此等荒地。原非額土。先核其高下。如遇荒年。可以酌減。民無不樂於從事。

皇朝經世文編

勘丈

民閒荒田熟田。主業絕業畝剛相錯。先宜親身履勘。畫分明確。然後寬其弓丈。詳註都圖土名。明開四址。明立標準。籍記頃畝。廣行招誘開墾。因其土宜。趁時布種。使窮黎漸食賤粟。則耕穫之實效可觀。魏了翁

疏 國朝李紱謂寬其弓丈。薄其科則。則差役可以無累。御史胡蛟齡亦謂墾田之初。宜體卹民艱。須有盈餘以資口食。盧紘亦言開荒之意。原以聚民。然民卒多惶懼。非畏其力不能開。畏承墾之後。索求無已。

惟於勘丈之初。如弓丈科則。在在留有餘地。須念此  
事爲。國家休養生息。推廣窮黎計。非培克聚斂爲  
逢迎上司。調劑官吏計。以上俱見皇朝經世文編

成法不必以十分爲率。令民稍得寬舒。潘耒送湯斌

撫江蘇序

○王星華均田法

本十四條  
摘取七條

一弓式當以官弓五官

尺爲弓。百四十弓爲一畝。弓有定畝。亦有定。二擇士  
民之殷富而誠實者。授以規畫。分派責成。戶房縣總  
不可輕用。三每社議社長一人。下則有知地人。凡弓



手算手寫手俱要老成。小社分兩三路。大社分五六路。其事易集四。每路各立印簿。註社長姓名。分給各長。如丈一畝卽填一畝。其地形方圓尖長。各畫一圖。或五畝一圖。圖註地名。必先填印冊。後註私冊。以免改易。五。每路各備木櫪。上闊下尖。削白明書四址地名。畝數與印簿相符。亦每路照官弓式各造一張。用印刻木弓筭。用鐵搭以防鬆寬。弓腳用鐵錐。以防支滑。七。積算畝數。每日各社長封送公所。擇老成明練者總核。總以一日了一日之事。官司隨時查對。不致

積壓弊混含煙小記

又凡丈量按部頒弓尺廣一步縱二百四十步爲一

畝方者廣十五步縱十六步乾隆十五年定有司於農隙時

親率里甲履畝丈勘應丈者四至不清者丈欺隱牽

累者丈有地無糧者丈有糧無地者丈畝步不符賦

則虛浮者丈熟荒相閒邊地番民相錯者丈壤界相

接畛域不分者丈荒蕪召墾寄糧分隸者丈水衝沙

壓公占如開渠築堤應抵以他地應豁豁除者丈

大清會典戶例

又取適中之地分四隅。鱗次而丈之。以千文編號。標記某字至某鄉共若干頃畝。共若干坵。籍註之。訪公直鄉老習於農者。品題高下而第其等。恐其侵於熟田也。先查鱗冊以判之。恐其影於鄰境也。先清界址以限之。恐其弊混於書吏也。令委官正士自爲攢造之地段。坵冊籍暨田之高下。既定。然後總鑄一石於各鄉。不得增減挪移。慮周而義著矣。臨漳府丈田記

又田土高下不能齊一。凡近城近邨多膏腴。僻遠山

鄉多瘠薄。然亦有通衢大市。不及遠鄉。而濱水之圻。沒臨高之肥厚。均非意計者。若非親身畢到。以爲舉一可例其餘。則姦人得以顛倒。他日授田於民。必有苦樂不均者矣。程三省條議上元縣事宜

### 招墾

招徠在不憚勞。不爽信。不爲煩苛。使民皆知其利己而無貽害。心無所畏。罔不樂從。鳳陽農政篇

又明洪武初。令荒閒田地。許人開墾。永爲己業。田地名目不一。尙有可考者。如重租田。官田。皆籍沒入官。

者。官募民種。半減其租。此外學田。廢寺田。無有業主者。如朱熹知漳州。請召人承買而收其租。又有站田。鋪兵田。弓兵田。宋元時以養鋪役。鋪甲弓兵之治盜賊者。凡此等悉沿其舊。不在招墾之列。然必須劃分界址。明註冊籍。以杜爭冒。明史

**又**順治間。給事中劉餘謨疏。流民務在實心安插。俾有所依。拋荒閒地。所在皆有。悉令有司招募。查明籍貫丁口。編立簿記。示以定章。計口授田。但不得於圈地之外。侵占有主之田。亦不準於承領之後。私募他

人頂種。

皇朝經世文編

**又**墾荒之人展轉趨利以求其便招墾者立法太嚴或不能禁止官人誅索民必畏避至墾者復荒是當招募之始立定簡明便易章程使之瞭然並著其籍於官民不慮其滋擾而可安心隴畝矣

儲方慶疏

**又**兵火之餘版籍錯亂逃者或復幸有餘粒以慰鴻雁之哀鳴大定之後自可度地度人以使服賦率

宋

論

有司奉咫尺之文造其地而號召之地段不稽田畝不攷籍貫不問土著游民不辨有賂者進無力者

待募於郊。不募則相聚而爲盜。從而飾詞中寢。或姑待焉。以是爲居奇之利。此鹵莽滅裂者。終不足以任事也。顧炎武天下郡國利病書

**又**凡該省荒地。必須全無別項出產。方準招墾。其現可割漆砍竹。採取構皮木耳等項者。悉聽民便。地方官不得目爲荒地。強民墾種。亦不得因獲微利。勒報升科。凡開墾各州縣荒蕪膏腴地。遷漲新開地。各邊口外曠地。咸分給墾種。招徠外籍入甲。及徒流之人。均準屯墾。給照爲業。民人承墾之後。或實在墾

不成熟仍準報官勘明銷照退業

均戶部則例

又豫東二省黃河大隄內外官灘地畝準召民墾種分別上中下則議稅其墾漲補撥等事仍照例核實辦理工部則例

附  
禁墾

凡墾荒除禁地及因事故例載封禁外值有古塚周圍四丈以內不得開墾。

又南旺湖內地畝除舊有河工柳圍葦地及先賢祠墓產書院膳田等項外其餘地畝悉行封禁毋許私



行佔墾。駱馬湖內灘地嚴禁附近居民私行墾種並不準借名升科。如有仍前任聽私墾者將失察之該管地方官及汛員一並嚴叅。民人照例治罪。工部則例

又乾隆五十三年

上諭荊州下游江內有窖金洲一道。侵佔江面。漲沙逼洲。而本地蕭姓契買洲地。種植蘆葦。環洲而生。阻遏江流。以致上流多所潰決。此必奸民因江中漲出洲地。墾種獲利。以升科爲名。其交官者不過數百分之

一。而地方官亦必得其利賄。現將蕭姓治罪。嗣後凡  
瀕臨江海河湖處所沙漲地畝除實在無關利病者  
毋庸查辦外。如有似害金洲之阻遏水道致有隄工  
地方之害者。斷不準其任意開墾。妄報升科。

嘉慶十四年

上諭山東運河全賴微山湖以濟漕。今山東多開稻田。  
截湖水上流之泉以資灌溉。湖中水流安能濟運。著  
山東巡撫派員履勘。如所墾之地已經成熟者。姑聽  
耕種外。其餘未墾及已墾復荒地畝。出示嚴禁。毋許

再行私墾。

又道光二十一年奉

上諭給事中朱成烈奏臺灣應墾地畝甚多請飭查辦  
臺灣道陳臺灣在大海中本一山橫峙廣近二百里  
南北延長一千二百餘里山後南北不及千里新開  
噶瑪蘭廳在山後淡水噶瑪蘭二廳臺灣鳳山嘉義  
彰化四縣生齒日繁地盡開闢久無曠土閒有山陬  
沙磧未報升科者爲數畸零若紛紛查丈必生事端  
惟彰化有水埔二社嘗爲民人開墾道光五年奉

旨恐啟蕃蠹永遠禁止

姚瑩東溟文集

又孫士毅疏向來海濱居民見有漲出沙地名曰沙坦開墾成田實爲天地自然之美利乾隆元年前督臣先後條議請給農民開墾升科均荷允準至乾隆三十七年尙書裘曰修驗收直隸永定河工程聲明近水居民與水爭地之弊奉旨通飭各省凡有瀕水地面毋許復行佔耕自禁之後民間視爲官荒轉生覬覦其閒良懦強豪不一始則偷種繼則搶劫逞凶滋事爭訟屢興甚至明禁暗墾民不納稅吏取

其租臣清查積案體訪輿情知沙坦原屬無礙水道查從前所禁專指內河出水要區恐高築堤埝阻遏水勢而言並非爲大海之濱漲生沙坦無礙水道言也未曾分晰周詳隨將沿海沙坦一律禁止幾同因噎廢食大海之濱一望無涯正望沙洋多漲一分卽居民多增一分衛護且利之所在爭趨若鶩與其禁之而陽奉陰違徒滋訟累似不如開之而給求養欲俯順輿情國家休養生息惠及羣黎有此無礙水道之沙坦置爲廢壤殊爲可惜且似禁非禁不官不

私尤非覈實辦公之道。皇朝經世文編

### 授田

明高帝時宋訥獻守邊策立屯法人受田五十畝。鴻

書

四夷攷

宣帝時趙充國屯羌戎人二十畝唐韓

重華爲營田使人耕百畝宋咸平中劉綜請開田五

百頃置下軍二千人計人二十五畝歐陽修請誘民

願田者一夫之力歲任廢田百畝迄不能成明制就

衛立屯每軍授田二十畝

廣治平略畝以今尺六寸四分準古

按今二十五

一尺計之古之百畝今得田二十四畝五分七釐六毫已過百畝矣今之百畝豈一夫所能任詳後附考

又漢制。一夫給田二十畝。別給一畝。課蒔餘果及桑榆不禁。應耕之田。不得種桑榆棗果。違者地入官。其二十畝以上地言也。

通典

魏諸初受田者。男夫一人。

給田二十畝。婦人五畝。年一十以上及癯者。各授以半夫田。寡婦守志者。雖免課。亦授婦田。諸民有移居者。三口給地一畝。以爲居室。奴婢五口給一畝。

魏書

食貨志

唐制。年十八以上。授田二十畝。爲永業。老及篤疾廢疾寡妻妾。皆以二十畝爲永業。田多可以足其人者。爲寬鄉。少者爲狹鄉。狹鄉授田減寬鄉之半。

唐書食貨志

國朝墾荒或助以牛種寬其徵輸或懸爵賞以廣招徠或給投誠以資贍養區畫周詳務使野無曠土

大清會典

又李安世謂井田難復宜更酌量令分藝有準力業相稱均田之制起於此宜分上地中地下地以定畝數文獻通考配地之初分別三等上地畝減中下地遞增可杜不均大率以二十畝爲上地中下地酌增其畝也

皇朝經世文編

國朝文錄

又一夫之力可耕旱地三十畝治水田不過十數畝



水田所入較旱地可倍增豫乘識小錄

又南方地窄人稠。一夫所耕多不過二十畝。力聚而功專。所獲甚厚。北方地土遼闊。農民惟圖廣種。一夫所耕有至六七十畝者。不知地多則糞少力薄。工作難徧。是以小戶種少而常豐收。應於招種之初。量力授田。每夫不得過三十畝。尹會一農桑四務

又先王馭天下。採其源而授制田之法。一事而三物備焉。田均而若樂之途不偏。故天下育也。法立而僥倖之路不開。故天下定也。民安而性情之節不亂。故

天下治也。自授田法廢而民無常業。天卽豐年。能豐於田之所在。不能豐於田之所不在。君卽薄征。能薄於斂之所及。不能薄於斂之所不及。民生汲汲皇皇。謀生之計百出矣。苟可救一朝之死。何所不忍。苟可延一日之生。何所不爲。苟可以智取。何所不詭。苟可以力獲。何所不爭。故禮讓衰而攘奪起。由是言之。立授田之法。非正教民爲善也。而善焉往。廢授田之法。非正教民爲不善也。而不善焉往。夫亂離久。則戰爭酷。而人寡。太平久。則生息深。而人眾。固常反覆相尋。

管子地員篇  
非必凋殘蕃盛。今古不同。且人寡則生者亦寡。而土曠。人眾則生者亦眾。而土闢。雖有飢歲。未聞菽粟告絕。天下之田。自足以供天下之人。準於人以酌分田之數。而不必百畝。安在其不給也哉。陳之蘭授田論

**又**古來經野之制。上農夫食九人。上次食八人。中食七人。中次食六人。下農夫食五人。是一夫終歲勤勤。受地肥者。所獲不過養九人。受地瘠者。所獲亦可養五人。蘇郡壯夫一丁。止可種稻田十二三畝。其歲收肥地不過三十餘石。瘠地亦可二十石。以每人日食

米一升科之則餘三十石者可食九人二十石者可食五六人農夫五等合上中下算之每夫可食七人而有餘粟。新輔生財裕餉疏

附  
田帖

做條編之法授田之初將年限遞徵錢糧一切徭役支應載於田帖使承募之人安於室家吏役無所施其計。漳州府賦征志

又明制以所丈之田具報於授田之官給予田帖若某鄉某段落田若干畝及舍人餘丁限年歲應納本

色若干備書於帖。受田者各付一爲執。萬厯閒永州府林推官人給田單一紙。上載土名丁田糧數。役無不均。糧無竊冒。其法至詳善。天下郡國利病書。

限期

後魏李安世疏。竊見州郡之人。或因年儉流移。棄其田地。漂居異鄉。事涉數代。始返舊墟。廬井桑榆。改易事已。厯遠易生。假冒彊宗豪族。肆起侵陵。羣證雖多。莫可取據。各附親知。互有長短。猶疑爭訟。遷延連紀。不判。良疇委而不開。欲令家豐歲儲。人給資用。其可

得乎。愚謂所爭之田。宜限年斷。事久難明。悉歸今主。然後虛詐之人。絕於覬覦。守分之士。免於凌奪。文獻通考

**又**知吉州徐常言。得以爲己業者。如其移變其居室墳墓。旣不可奪。又其歲久。甲乙相傳。難期得實。若令舊主新募。兩不失業。須善其調停。唐時諸陸田。限三月三十日。稻田四月三十日。以前上者。並入後人。以後上者。入前人。其麥田以九月三十日爲限。若前人自耕未種。後人酬其功直。已自種者。準租分法。不得

過六斗。

通典

漢陽鎮撫使陳規倣古屯田有逃戶歸

業者過三年不受理。

文獻通考

**又**新荒之地其原主若有子孫情願承領者查實準其開種。若非其子孫他人領種其原主或流寓他省未歸先宜出示招徠復業如二年不歸卽爲無主之田聽人承領開種之後原主不得爭競。黃六鴻養民四政

**又**各直省實在可墾荒地無論土著流寓俱準報墾。凡報墾必開其界址土名聽官查勘出示後五箇月

如無原業主呈報。地方官卽取結給照。歲應彙報。戶例

### 牛種

漢時田五頃用耦犂二牛三人。文帝時趙過爲搜粟都尉。民閒苦少牛。平都令光教過以人輓犂。多者日三十畝。少者十數畝。武帝初令有司課畿內使無牛家。以人牛力相資。其有牛家與無牛家。一人種田二十畝。償以人鋤工七畝。如是爲差。至於老幼無牛家。種田七畝。老小者償以鋤工二畝。北齊或有人力無



牛。或有牛無人力者。須令相便。後魏李彪請以贖贖雜物市牛。唐李泌亦請發藏繒市牛。開元中令諸屯田應用牛。山原川澤土有硬輻。至於耕墾用力不同。土輻者每五十畝配牛一頭。土硬者每二十畝配牛一頭。稻田每八十畝配牛一頭。張全義爲河南尹。出見田疇美者。勞以酒食。或訴以乏牛。則召鄰田責之曰。何不助之。由是鄰里有無相助。比戶蓄積。宋世良請以富家牛先耕貧人。朝列稱善。漢書 通典 文獻通考

又荒田肥瘠不同。耕種難易不一。其有缺少牛畜。宜用人耕之法。二人拽一犁。慶厯間。范雍括諸郡牛以耕。而民擾。北地多以驢代牛。然與水田不宜。文獻通考

又元和間。詔郡國募人無田者。到所在爲雇耕庸。賃餽種。貰耕牛。田器。定歲除算。官司出借籽種。本屬美意。而因緣求索。罄其所獲。不足以償。遇年歲荒歉。官民交累。天下郡國利病書

又畝之廣長不一。古以百步爲畝。漢以二百四十步

爲畝。唐以廣百步長一百四十步爲畝。後又以百二十步爲畝。一牛之耕。量其力之能任。而人力居其半。

文獻通考

郡縣志

## 富民

元泰定中。虞集言。聽富民欲得官者。合眾分受以田。明永樂。鹽商赴邊種粟。邊粟大充。蓋巨商之力。足以佐軍民所不及。良法也。今宜略倣其意。凡畿務近地。專召墾荒。招賈人。貲厚。明習農事者。聽其相度。徧墾積荒之田。足國足餉。惟茲最要。今鹽法之舊。雖未能

復須令有力者隨宜布墾。但使荒蕪日闢。穀價不騰。民可休息。

元史

廣治平略

鴻書

**又**寄莊議。貧民種田。牛力種具不時有。塘池隄壩不能修。一遇水旱。則付之天而已。富室於此等力能預爲。故非大水旱。未有不收成者。况富室不能自種。必業與貧民。民雖業產而實與富室共其利。收一石人分五斗。收十石人分五石。而賦糧又辦於富室。時有水旱。富室且假貸而給之。故曰富室乃貧民之所依。可有而不可無者也。

天下郡國利病書

又今天下幅員既廣。生齒日繁。司農懷仰屋之嗟。度支有坐困之歎。總計出入之數。即使賦額全完。入數猶不抵出數。則何不思所以變計也。爲今天下之計。莫如開墾荒田。而墾荒則必使富人爲之。何以言之。國家亦嘗置吏議墾矣。然民之殷足者。必不赴之。而應募率皆貧民浮戶。欲其自備牛種。則無力。欲官爲之。備則無財。而民仍無所托。夫所謂富民者。制田里。供賦稅。給徭役者也。其召募游民。葺理房舍。疏通水利。以至牛種耕具。易辦也。今不必議僉報議遠徙。但

令就地承領而募貧民以耕如田主之佃戶然仍責成地方官先令清丈荒熟劃分段畝分明四址標題籍記具報某地若干頃畝不致侵占他田仍按章定制則何患凌土著而掩其所有乎若虞有兼并今海內之兼并者幾何人况盈虛消長不數年而變更未可泥於陳言也

張宸商屯議

恆產瑣言

### 專官

三代以前專設農官久矣漢以趙過爲搜粟都尉敎民墾田殖穀馬援請置長吏馬成置戍己校尉魏棗

祇屯許下置田官。六朝時置司馬置農官。置都使子  
使。太和閒有司請別立農官。唐設農寺專領其事。張  
全義爲河南尹。令麾下爲屯將。招農戶耕種。流民漸  
歸。又選使者爲屯副。選諳書記者爲屯判官。五年民  
皆復業。請置令佐以治之。宋以韓重華爲營田使。何  
承矩爲屯田使。募吏之習田者爲田官。紹興中以兵  
屯使大臣民屯使縣令主之。當時劉光世韓世忠張  
浚岳飛吳玠及江淮荆襄諸帥悉領營田使。尋以監  
司領之。大中祥符閒改置營田務。凡九州皆遣官兼

務天禧開詔轉運使置營田明分屯設衛有指揮千戶百戶層層鈐制畫地而耕其法最善自守邊將吏得以官田自便擾及民田管田之官不足以服民矣

歷代史

國朝雍正初有水利營田府設監察使二

員副使二員八年罷

直隸通志

又有巡農御史不久

亦罷

雍正

上諭

### 築堡

馬援屯三輔繕城郭起塢候杜茂屯北邊馬成屯中山治郭寨十里一候趙仲卿屯寨下勒百姓各立堡



韓重華東西營田就高築堡凡六百餘里列柵二十餘所田況分營田五百人爲一堡三兩堡置營田吏領之明御史葉盛巡按宣府募民墾田修築城堡七百餘所

歷代屯政

又關隘以詰奸而堡砦以收保此官政所最急者近多重邊堡而輕民堡殊不知賊入則不趨邊堡而趨民堡矣况不虞之備安不忘危使各堡之民俱修備防守互相綢繆長城豈獨在邊堡哉

階州志

昔趙充

國魏棗祗墾闢田疇無有害其成者今禾黍未登而

馳突蹂踐不可必。苟嚴其設備。以限戎馬之來。則無在莫非可耕之地。文獻通考

營屯之利有六。耕不廢守。一也。既據爲樂土。探伺密而有固心。二也。有室家以固其情。因以編爲行伍。三也。民親附而爲我用。四也。束伍部分。不離其素。堡柵器械。以時而修。卒有不虞。符旦而下。夕至。五也。民有所止。不至駭散。六也。主夫之讀通鑑論

### 設長

役之別。有坊里長。糧長。坊里長。在周爲鄉遂。初非役

也。漢承秦置亭長。送徒畜馬。皆得使焉。則漸近於役矣。唐宋皆置里正。南渡後爲保正長。按唐書睿宗時御史韓琬言。往者里正長一缺。充者輒數十人。近差人以充。致有逃亡。爲儕於役。而人畏其難也。宋初爲差役。後爲雇役。又爲義役。古人所以制鄉遂之意。蓋蕩然矣。元以五十戶爲一社。置社長一人。鄉置里正一人。明制。每年里役有長一人。十年而有編審。先後無得私焉。有存亡。有賣買。里長記之。其長不任役。則選同里與比甲之次丁代之。但其役也。本以承勾攝。

督催征而已。後乃百凡科斂皆在焉。糧長卽漢之嗇夫與宋之戶長也。明制每區設正糧一人副二人。由京給勘合。任催辦稅糧。責愼之意。其重如此。歲久乃令眾戶朋充。奉國卹民之意廢矣。天下郡國利病書

又里長係諸版籍。任催征勾攝之事。少得津貼。且有樂從之者。近有好頑忌之。或有欺凌富厚。輒告里長。因而嚇詐取財。當事者不察其虛實。輕聽更替不得其人。轉使小民不得安生。前人糧里記

又里有一百十戶。以十戶爲長。餘百戶爲十甲。里長

清日朝要 內篇一 三  
董一里。甲長董一甲之事。鰥寡孤獨不任役者。附十  
甲爲奇零甲。其冊每年一更定。卽編審之制也。盛百

二編審論

又明制。每年收穫之後。里長入役之先。各稽其里之  
貧富消長。丁口增減。年穀豐歉。躉甲冊報鄉長。彙呈  
於管領之官。不由胥役包派。供役納賦有不均者。許  
其指告。若夫非常不端之事。責之里甲各長。隨時舉  
發免究。續通考里役議

又漢制有職分田。如太守十頃。治中別駕八頃。縣令

郡丞六頃更代相付賣買坐如律今置官領事遞爲  
鈐束宜倣其制酌給田畝任其佃種不得派力於他  
田官代田附如上制通典屯官議

附 保甲社倉社學

招募之初如至十家卽先立爲一甲甲有長十甲爲  
里里有長奇零之戶各附於所近之甲而統於里里  
長統於董事之官陰以兵法部勒之官訓其里之各  
長里束其甲之各長甲束其戶以相保衛鄉人見縣  
官之日少見里長之日多里長得其人則鄉人莫不

自愛此教化之本也。周之時自鄰長而外皆爲士大夫。之有德行道藝之賢者能者而遂各道其親親長長慈幼之恩。勸之以相保相愛相救相賙之誼。敎之以祭祀喪葬昏冠飲酒之禮。耕則趣之。役則均之。媿者賞而惡者勸。而無不共其職。故成康之世天下無不治之民焉。後世里長與奸役相勾結把持鄉曲。愚民畏之如虎。此等而欲其約束鄉里宜其囂然而不樂也。夫游手好事之徒而授之以柄。彼必與吏胥朋比。生事害民。使之率眾巡行。且有反借以爲姦爲宄。

者矣。然則里甲長不可立而保甲終不可行乎。曰。是誠在官之擇人而任。而有以督察之。如有害於其鄉者。事發覺則犯法者與里長甲長共治其罪。務在蠲除一切苛察之條。使無所借口。如此則不至於擾民而錢糧勾攝責成有人。保甲團練弭盜安民。未有不從茲舉矣。

劉淇里甲論

沈彤保甲論

黃中堅保

甲議彌盜論

又周禮族師五家爲比。十家爲聯。使之相保相受。宋熙甯保甲之法。實昉於此。而就相生相養之地。以行



政教於其中。蓋有兼濟之道焉。夫與保甲相經緯。推廣之而莫竟其用。莫如社倉。隋開皇時。長孫平請立義倉。其時建倉於堡社。穀本皆出於民。朱熹爲浙東提舉。得常平米六百石。請本鄉朝奉郎劉如愚任賑貸。夏受粟於倉。冬加二計息以償。逐年斂散。得息米造倉廩。至存米三千餘石。不復收息。只收耗米三升。鄉民數十年。雖遇凶荒。人不闕食。是其米借自常平。本出於官。而息收於民也。義倉之設。建在當社。於民甚便。然隋倉之積。徵本於民。是正供之外。又復加徵。

其本已失。但常平在城糴糶不能無弊。義倉之積。倣社倉法。集豪富以輸將。又或按糧科派。皆未盡善也。且恐前官一易。按籍而稽之。則以冊爲倉。其米安在。應請自今於民賦內留其什之一五。入穀於本里堡倉。初積之一二年。里穀無多。分存於本里公所。里長管之。每歲春借秋還。俟本息充盈。分造倉廩。官稽其數而已。年收年貸。家給而人足矣。戶之奇零不足一甲。甲之奇零不足一里。則附近甲近里。不限以十里。甲俱窮之鄉。酌量行之。或以積至三千石。恐無劉如。

愚其人。則堡里守之者眾。當社之民。可以分勞。如十里。有白家之眾。數人管理。年清年欸。上下交代。稽查尤易。况一里之民。豈無良善。眾之所推。在在皆有。行之既久。戶登康阜。積穀日多。以其餘息。因倉之近地。建立社學。膏火可資。息又有餘。則里中之鰥寡孤獨。婚喪無資。皆可因而給之。豈非推廣之上治哉。晏斯盛保甲社倉相經緯兩疏

**又**洪武中。每坊各建社學一區。以學行者。耆舊爲之師。子弟悉令通孝經小學。諸書其俊秀者。送入鄉學。嘉

靖中學使楊宜簡諸生堪教習者與爲社學師。建於鄉者曰義學。曰社學。曰經館。鄉長主之。其實皆鄉學也。江甯府志 皇朝經世文編

### 起科

洪武中詔有能開墾者卽爲己業。永不起科。景泰六年尙書張鳳等奏山東等省有甲方墾種乙卽告不納糧。若不起科爭競之風終難杜絕。今後但減輕起科則例。每畝科米三升三合。每糧一石科草二束。不惟永絕爭端。抑且少助廩積。從之。明史 顧炎武曰從

古無不起科之地。國初但以招徠墾民立法之過。反

以啟後日之爭端。

日知錄

天順六年巡撫劉存奉定

招佃荒田例。不論原額肥田畝稅米三斗。瘠田二斗。

謂之官租。仍與民約。永不起科加耗。

大政記

明中書

省奏請官給牛種者十稅五。自備者十稅三。詔且勿

徵。俟三年後畝收一斗。

明史稿

又水田六年起科。旱田十年起科。如本官招墾及官

生捐墾。以田歸佃。次年起科。隱墾首報。當年起科。豫

征私斂者罪。

戶例

雍正六年

諭安西沙州等處招民屯墾原爲惠養邊民之計。是以累年以來備極籌畫經營期其得所。今從民戶到齊之日計算。至辛亥之年。乃例當輸賦之期。但小民甫經安插。公私兼顧。爲難著寬期二年。於癸丑升科。俾民力寬裕。俯仰有資。雍正 上諭

又侍郎崇厚疏。咸豐九年。欽差大臣僧格林沁督兵大沽海口。以海河兩岸舊有水田。日久荒棄。倡勸捐資。在於鹹水沽營田三千五百四十畝。葛沽營田

七百五十畝挑溝建閘引用海河之水以資灌溉就地招集農民給資本認種相度規畫使斥鹵之區成爲沃壤今已四載歲獲有秋附近居民咸知水田之利卽有泥沽等村自行開墾稻田多頃均有成效新招之佃與現墾之田均應給發佃戶資本春借秋還原定每地一畝初年交租三升三合次年五升三年以後一斗二升又每地一畝半交稻草一束計重五十斤現據各個戶聲稱地有肥磽歲有豐歉除交租外所餘無多詳加體察如葛沽土肥原定每畝一斗

二升。毋須酌減其鹹水沽賴人工力作。應照原定之數酌減十分之三。並請嗣後稻田租米。倣照社義倉例。由天津道妥爲經報。耶鈔

又因地定賦。必知之明而後處之當。吏胥防細弊。冊籍不可不詳。君子持大體。惟撮其要。懷慶田賦論明

太祖令蘇松杭嘉湖畝稅除其半以甦民力。曰。民猶樹也。樹利土以生。民利食以養。養民而盡其利。猶種樹而去其土也。江南通志

又賦額如海。見者望洋。况米之數。曰升。曰合。曰勺。曰



杪曰撮曰圭曰粟曰顆曰粒銀之數曰釐曰毫曰絲  
曰忽曰微曰纖曰塵曰沙曰埃此項積之無補於邱  
山而算之甚昧於心目前輩有云銀至釐而止米至  
合而止其下悉宜除之不然徒墮奸人之混淆可恨  
也。錢糧瑣碎論

又昔邱文莊論田土戶口賦稅及條段必須載明使  
官民均有所稽考不致爲人混淆今宜做行督令里  
書查算花戶逐名之下詳開田地若干該徵米銀若  
干務期總散相符每冊二分印鈐一存縣一存各總

甲收執照數徵輸如有更易年終由總長報明

浙江

志田賦書略

我朝康熙二十四年重修簡明賦役

全書刪除絲杪奇零延議舊書遵用已久遂罷頒

行乾隆三十年以全書多載不經名目而奏銷冊前

列山地田蕩版荒新墾次則三門九則極為明晰令

嗣後全書依奏銷條款於是全書與奏銷條款合而

為一。又有曰易知由單以地之上中下則令將每畝

應徵實數開明刊給花戶

始頒於順治六年至康熙二十六年官吏索紙版之

費停止

曰截票列征銀之數分為十限完則截之其票

鈐印中分官民各執其半。卽串票也。

順治十年行二聯。康熙二十八年

年乃用三聯。一存官、一付民執照。曰滾單。康熙三十六年行征

糧滾單。每十戶五戶共一單。分十限。依次滾催。曰順莊編里。雍正六年行順莊之法。以的戶爲主。凡寄莊寄糧悉更正之。後仍復三聯之票。自是未改。

大清

會典

又乾隆二十四年。江西巡撫阿思哈奏請清查委員勘丈田有溢於額外者。照畝加賦。有缺於額之中者。不減其徵。自是田之所入皆在於官。遇有年歲不調。

官民交累三十五年。巡撫吳紹詩悉心擘劃。請得除去缺田。餘田分則遞減。有水冲沙壓者。仍準報蠲。民力藉以少舒。則先事圖維。使窮簷獲濟。豈非在上者之責哉。贛州府志

附  
免科

郊壇。社稷山川厲壇學校。闕里。孔林四氏學。周公廟各聖賢祠墓均免升。大清會典

乾隆三十二年。用兵緬夷。蠲免滇省兩年額賦。凡過兵之處。各免三之一。以爲例。三十九年。以金川用兵。

免四川租賦

大清會典

又凡內地及邊省零星地土。聽民開墾。永免升科。其免科地數。福建江蘇蘇州及安徽湖北湖南之水田。廣西中則以上水田。四川之下田。上地。中地。以不及一畝爲斷。直隸江西及安徽湖北湖南之旱田。以不及二畝爲斷。浙江江甯及廣西之旱田。以不及三畝爲斷。陝西及河南之中地。廣西之下則水田。以不及五畝爲斷。山西下地。山東中則以下地。雲南貴州之山頭地。角水濱河尾。廣東之畸零沙地。高雷廉三府。

之山場荒地。不論頃畝。概免升科。奉天十畝以下。尙宜禾稼者。減半徵租。其岡埠海窪之地。僅宜雜植。不成坵段者。亦永免升科。戶部則例

### 丁徭

唐定租庸調之制。謂有田則有租。有戶則有調。有丁則有庸。然男子十八以上。給田百畝。則庸調所出。一皆取之於田。而宋世排年任役。其免役之法。畝稅一錢。則賦役同出於田久矣。昔楊炎併租庸調爲兩稅。明嘉靖後。行一條編。均徭役里甲與兩稅爲一。民以

稱便惟是米穀者農之所出銀者商賈之所流通地糧猶兼輸米丁賦名兼米豆實則皆銀不免銀貴穀賤有傷農業條編便於細民而不便於上戶論者謂地多者無路詭避各項應募不能託名里書無從需索市井棍徒無從包攬故立法爲善明中葉以後事煩費重一切雜派於民條編之例名存實亡作法於涼其弊猶貪若此

明會典

王圻平賦問答

熙朝

紀政  
明御史戴璟倣條編之法謂隨糧帶徵則富者安貧者無廢業遠役之苦昔王介甫雇役之論舉朝

攻之。今亦未可厚非。在良有司經理均平。毋格外誅求與民休息。

亭林文集

朱廷益謂一邑繁重瑣碎之

事。不責之里長。里長不能分派於民。如有興革大舉。選居民大姓有行義者充之。事畢而罷。亦不必盡用殷實之戶。乃知其慮深遠矣。

揚州賦役記

又康熙十一年。以浙江鹽鈔銀均入地丁。三十六年。以浙江匠班銀七千餘兩。派入地丁。地丁之名已見於此。後乃定制通行五十五年。準廣東所屬丁銀。就各州縣地畝攤徵。每地銀一兩。攤丁銀一錢六釐四



毫不等丁隨地起見於明文者自廣東始

大清會

典事例

雍正元年直隸巡撫李維鈞請丁銀隨地起

徵部議允之每地銀一兩攤丁銀二錢二釐

長蘆地攤入

寬地每畝六釐至一分不等

二年定福建地銀一兩攤丁銀五分

二釐七毫至三錢一分二釐不等屯地自八釐三毫

至一錢四分四釐八毫不等其丁少糧重未能攤入

者至乾隆間改爲中則三年定山東地銀一兩攤丁

銀一錢一分五釐

寬地攤入每畝一分四毫有奇

四年定河南地

銀一兩攤丁銀一錢一分一釐七毫至一錢七釐不

等從巡撫田文鏡請也。是年定浙江田賦一兩攤丁

銀一錢四釐五毫。又定陝西地銀一兩攤丁銀一錢

五分三釐遇閏加四釐。

邱嘉穗丁役議陝西鄠縣城固沔縣丁隨糧行皆始於明

季後乃

甘肅分河東河西河東地銀一兩攤丁銀一

錢五分九釐三毫遇閏加河西一兩攤銀一分六毫。

遇閏不加。

按甘省均丁與他省異他省以一縣之丁均入一縣之地畝甘省則按通省合算每

銀九錢零

每糧九斗零攤入一丁額徵多則攤丁亦

多額徵少則攤丁亦少以致均丁不公因糧少丁多

之處恐載丁過重以

四川每糧五升三合至一石九

斗六合不等。算一丁徵收雲南不按科則每丁徵銀

二錢八分有至六錢二分不等。其改土歸流願納丁銀以比齊民者以石

糧爲一丁納五年。定江蘇安徽丁攤地畝屯丁亦攤

入。每畝攤丁銀一釐二毫至六分二釐九毫不等。又

定江西地銀一兩徵丁銀一錢五釐六毫屯地二分

九釐六毫。六年。定湖南地糧一石徵丁銀一毫至八

錢六分一釐不等。按江蘇安徽以畝計丁湖南四川以糧石計丁與他省不同又

定廣西地銀一兩徵丁銀一錢三分六釐不等。七年。

定湖北地賦一兩徵丁銀一錢二分九釐六毫。江夏十九

屬向有重丁其乾隆元年。定山西臨汾縣等二十四

科則亦不同。

屬丁徭酌歸地糧。餘仍隨丁徵納。十年戶部議準山西丁糧分辦。將太原等十八縣全攤地畝。每糧一石攤丁銀一錢一分八釐。至二錢二分二釐。賦銀一兩攤丁銀一錢四分七釐九毫。至三錢三分八釐不等。交城等十五州縣丁銀半攤地畝。甯鄉二縣以下則徵丁。餘銀歸地。渾源等州縣攤丁銀三分之一。河曲十分之一。餘仍丁地分辦。二十三年定山西州縣有全攤地糧者。有每丁徵銀三錢一錢一錢三分三釐者。有攤三之一。十之五。十之三者。有丁銀均照中下

下下二則者有按下上下中下下三則分別貧富均納其寄居年久有產之戶亦按下下則輸納徭銀者。稷山縣丁徭銀道光三年始攤入地畝。臺灣攤徵於乾隆十二年。貴州攤徵於乾隆四十二年。山西以富人田少貧民種地代納丁銀不願計三次改歸地糧者四十一州縣其餘或分丁糧一半或三分之一。或按下則徵收者三十七州縣此外二十六州縣仍丁糧分徵其謂不可辦者或以賦額重輕或以地土瘠薄或以民多逃亡爲詞其由紳富畏攤丁賦里胥貪

存編審改富升貧移甲換乙留爲地步亦所不免  
大清會典 皇朝通考 賦役全書 癸巳類稿

**又**乾隆三十八年湖北巡撫陳輝祖請將民屯新墾  
丁銀隨年攤徵經部覆準已通行各省

**上**諭朕愛養斯民詎於丁糧稍存計較若以新墾民屯  
田畝復將丁銀隨年分攤較及錙銖非惠下卹民之  
道 勅各省毋庸另議更張大清會典事例 按  
自此以後凡各省新墾  
田地不復  
派丁矣

**又**自今一切不急之役有當用人力者皆俟農隙前

澤日朝夢 丙集 三  
代蓋有不恤農事。而以徭役妨農作者。不可不謹。聖  
學格物通

### 任人

營田之法。非內外得人。則不可得。而行趙充國屯田。  
魏相實主之。韓重華屯田。李絳實主之。此內得人。以  
贊其議也。婁師德屯田豐州。身衣皮袴。以先士卒。郭  
子儀屯田河中。自耕百畝。以率將校。此外得人。以贊  
其事也。後此有謀國如理家。如而人者乎。廣治平略

**又**宋以何承矩爲屯田使。沮之者頗眾。旣種不成。羣

議愈甚。乃遣使載稻穗數車。送至闕下。議者乃息。文獻通考

**又**相地墾種。修濬陂塘。以備水旱。使民耕獲而有所賴。此百世之利也。大抵親民之官得人。則百廢舉。不得其人。則百弊興。此固守令之責。風憲之臣皆所當聞。明楊溥疏

**又**守令親履莊村田畔。與父老子弟常接見訓告。方能熟悉其風俗之美惡。田土之高下。而教令有所施行。惟有識者精心求之。方知其條理脈絡耳。朱澤雲



田賦總說

**又**久任得人。則民安其治。久任失人。則民之欲去之。也不能以旦夕待。故久牧民之任。得失猶參半也。苟得其人矣。乃未久而已離乎其位。欲行者未之能行。欲已者未之能已。授之他人。而局又爲之一變。勿論其君子小人。而有嘉穀莠稗之判。卽均爲君子所學異者。議論相雜而不調。以兩不相謀之善。敗共圖一事之始終。條緒判於尺尋。而得失差以千里。求如曹參之繼蕭何守畫一之法。以善初終者。百不得一也。

王夫之宋論

**又**人材有太小之殊。善用者取長略短。皆足以有濟。善聽者去非從是。皆足以有補。所任之人。使敷陳所蘊。而考察其行能。條舉眾弊。而分委以經畫。課其效之成否。隨之以黜陟焉。如此則可用之人出矣。真德秀西山文集

守法

立法之始。賞罰嚴明。政必不媮窳。其後玩愒成風。上下相承。或優游城市而不見阡陌之巡。或憑信簿書。

而不較儲積之實。踵弊襲偷。恬不知怪。良法之壞。又何惑乎。夫欲收拾人心。消弭禍亂。不復爲國家建無窮之利。而竟因循廢格。以滋利階。是不亦可爲寒心哉。

四夷考

滴露漫錄

**又**百官有司。不知上之所欲爲。而人各有心。及發一政。則曰姑試行之而已。所用之人。無常責。所發之政。無常效。萬全之利。以小不便而廢者有之。其規模不先定也。若與明者熟察之。發之以勇。守之以專。達之以彊。日夜以求合於其所規模之內。而無務出於其

所規模之外。其人專其政一。然而不成者。未之有也。  
蘇軾東坡全集

**又**率作以興事功。又必謹持其法度。蓋樂於興事者。易至於紛更。興事而數考其成。則有課功覈實之效。無誕慢欺蔽之失。興事考成二者。皆當深敬而不可忽也。然煩瑣細碎。則下懈怠。不肯任事。而事廢壞。所當戒也。  
蔡沈書經集傳

**又**堅持初志。能耐煩勞。有益於民生之事。不以小而忽。不以難而阻。精神處處周到。卽處處造福矣。  
陳宏

勸懲

文帝十二年詔十年野不加闢是吏奉詔不勤而勸民不明也吾農甚苦而吏莫之省將何以勸焉元和三年詔肥田尙未盡墾貧民務盡地利勿令游手

漢書

秦始初詔省徭務本并力墾植使耕者益勸

晉書

元嘉八年詔自頃荒萊不闢督課無聞不深存務本

豐給靡因郡守賦政方畿縣宰親民之主宜思獎訓

導以良規使地無遺利

宋書

建德四年詔曰詩不云

乎弗躬弗親庶民弗信刺史守令宜親勸農躬自率

導

北周書

貞觀十二年詔頃歲以來雖稍豐稔猶恐

生穀之疇未墾以是眡念遣使勸民開闢

冊府元龜

建隆三年詔生民在勤所寶惟穀陽和在辰宜行勸

誘令民廣務墾種

玉海

中統三年命管民官勸誘百

姓開墾田土不得擅興不急之務妨奪農時

元史景

泰三年令民丁多田少之家有司酌與開墾他田

明

會典

又順治六年

營田斷要

內需上

三九

諭自兵興以來。地多荒蕪。民多逃亡。流離無告。深可憫  
惻。著戶部傳諭各撫按轉行所司。各處逃民。不論原  
籍別籍。必廣加招徠。編入保甲。俾之安心樂業。察本  
地方無主荒田。州縣官給以印信執照。開墾耕種。永  
以爲業。各州縣以招民勸耕之多寡爲優劣。道府以  
責成督催之勤惰爲殿最。歲終撫按分別具奏。康熙  
十二年

諭戶部見行墾荒定例。俱限六年起科。朕思小民拮据  
開荒。物力艱難。恐催科期迫。轉致失業。朕心深爲軫

念以後各省開墾荒地俱著再加寬限通計十年方  
行起科其該管地方官員原有議敘定例如新任之  
官自圖紀敘故掩前功紛更擾民者著各該督撫嚴  
行稽查題參處分雍正元年

諭戶部國家承平日久生齒殷繁將來戶口日滋何以  
爲業惟開墾一事於百姓最有裨益但向來開墾之  
弊自州縣以至督撫俱需索漏規致墾荒之費浮於  
買價百姓畏縮不前往往往膏腴荒棄豈不可惜嗣後  
各省凡有可墾之處聽民相度地宜自墾自報地方



官不得勒索吏胥亦不得阻撓至升科之例水田仍以六年起科旱田以十年起科著著爲定例其府州縣官能勸民開墾地畝多者準令議敘督撫大吏能督率各屬開墾地畝多者亦準議敘

**又**州縣官所墾多寡道府等督率勤惰歲終並入考成紳士倡率者予敘隱匿自首者免罪橫征抑報者罪之戶部則例

**又**張全義爲河南尹出見田疇美者輒下馬召田主勞以酒食有蠶桑善牧者或親至其家悉呼出老幼

賜以茶彩衣物。民閒言張公不喜聲妓。見之未嘗笑。獨見嘉禾良繭則笑耳。有田荒穢者。則集衆杖之。在洛十四年。遂成富庶焉。文獻通考何福以積穀多。特降勅獎譽。康茂才所屯充牣。乃歸之民力。以慰激勸。  
廣治平略

**又**漢武帝之修立法度。宣帝之勵精圖治。其制度雖與三代不同。當時但問開墾幾何。光武中興亦只問天下度田多少。當時以度田不實。長吏坐死者無數。  
葉適田制論

又民者冥也。智不自周。必待勸教。然後得盡其力。諸州郡縣。每至歲首。必戒敕部人。無問少長。但能操持農器者。皆令就田墾發。以時勿失其所。若游手怠惰。早歸晚出。好逸惡勞。不勤事業者。則里正長牒名郡縣。守令隨事加罰罪。一勸百。此則明宰之教也。蘇綽傳

又經界最急之務。在於推擇官吏。汰其昏繆疲輒力不任事者。令郡守察其所屬。使之審思熟慮於始。而委任責成於終。事畢之後。量加旌賞。晦菴集條奏經

界狀

又勸農之法。如南畝西疇。正當有事。則一切胥役不許下鄉。恐迫呼妨業。如秉耒執筐。都無暇日。則一切雀角鼠牙。不與聽理。恐牽連失時。如野有荒田。則督其墾殖。以盡人功。如地鮮水利。則令開溝洫。以資灌引。如民多遊手。則力禁賭博。嚴查宵匪。而人皆食力於耕鋤。野有惰農。則禁止賽社。驅逐窩娼。而民皆相安於勤苦。凡此所以勸之也。至於春耕秋斂。所謂主伯亞旅者。咸舉趾田間。公務之暇。不時單騎。減從親

詣鄉邨問其播種者如何收穫者如何獎其勤樸戒其奢靡諭省物力於豐收令儲蓋藏於籽粒麻麥桑柘之間以與父老子弟殷殷相慰勞聞其憂則恤聞其喜則慶俾知長官重念農桑莫不感激鼓舞以自盡力於出作此又勸之以心而非但勸之以身也

欽頒州縣事宜

營田輯要內篇上終

營田輯要內篇上之下

貴筑黃輔辰述

水利

國朝屢頒

諭旨興修水利經理田功雍正三年派怡賢親王查修北直水利開墾田畝康熙間命撫臣大築隄堰

親臨省閱誠以水利與農田相濟未有不治水而田可墾者

皇朝經世文編

又溝洫之法至周而大備如遂人匠人稻人之屬所

爲瀦瀉於五溝間者。抑何纖悉詳明也。自經界之法壞而溝洫之屬可知已。天下才幹之士。起而謀一方之利者。在春秋戰國則起芍陂於楚者。雲夢有豐稔之祥。鑿漳水於魏者。鄴旁有稻粱之詠。導涇水於秦者。谷口有禾黍之謠。在漢則文翁穿浹口於巴蜀。鄭當時通渭渠於長安。嚴熊穿龍首渠於馮翊之地。倪寬穿方輔渠於左內史之治。白公引涇水於池陽。張敞築塘於新豐。王景修芍陂而廬江熟。馬臻開鑑湖而會稽稔。桑宏羊復輪臺之渠。溉田五千頃。在唐則

李襲築雷陂勾塘以溉田長孫祥破白渠碾磨以導  
水在宋則劉蕡興水利而治著循聲范仲淹築海隄  
而民改姓范許景山修蕭何之故堰而廢區復蒙大  
利趙尙寬修召信臣之故渠而荒壤悉變腴鄉其著  
於明代者則夏原吉躬親經畫而東南水利舉劉大  
夏躬親相度而西北水患平興天下之大利除天下  
之大害固非其人莫任與

廣治平略  
一條論得人此

**又**夫南北殊方燥溼異性故旱田之不可爲水猶水  
田之不可爲旱也今必欲以荆揚之物產徧植之雍



冀是第知水利而不知因地之利以爲利也。果行遂人溝洫之法則西北旱田其利亦何減於東南。何則西北之地廣輪旣數倍於東南。且穀之種類繁多。有宜五種者。有宜四種者。有宜三種者。周原膴膴。土脈厚而水源深。其肥沃比東南之塗泥。又奚翅倍焉。所患者惟水與旱耳。溝洫修而水旱有備。則西北諸郡縣歲之所入。非徒不減於東南。且什伯而無算矣。觀周禮遂人之法。原與稻人之法不同。蓋稻田不可以無水。旱田則潦之爲患者十之六七。旱之爲患者十

之二三。故遂人五溝之大小不同。其實皆溝也。今第相其地之下者。以爲行水之區。又相其地之最下者。以爲蓄水之所。疏其節而闕其目。不用盡復古溝洫之制。而已獲溝洫之利矣。今之爲吏者。多置西北溝洫之政於不講。其講溝洫者。又第知有稻人之法。而不知有遂人之法。此西北之所以比歲不登。民苦乏食也。官獻瑞經筵講義

**又**江南以水與平地較。水得十之五六。故稱澤國。環江帶湖。縱爲浦橫爲塘。其支流所在。爲港。爲涇。爲蕩。

爲潰。爲瀆。爲渰。爲淪。隨地異名。堰以瀦之。壩以壅之。  
隄以束之。圩埧以衛之。閘以時啟閉之。水至有以泄  
橫流之潰。水退有以漑高仰之田。所以雨不溢而旱  
不涸。田獲有秋。西北地高水少。水利之行難於南土。  
然非必不可行也。近山者闢泉吐溜。濱河者穿渠引  
流。導之灌田。以殺水勢。其淀之低窪者。堪以蓄水。稍  
高者。如南方築圩之法。皆可隨時宣洩。至平行處。開  
塘鑿井。足資浸灌。行之未嘗無成效也。

籌濟編 以  
上二條總論

南北  
水利

**文**昔太倉張櫟論水利。纂圖志以便考閱。以爲水之爲利。惟其所至。人皆得而利之。而爲一人之所專。此爭訟之所由起也。今之區地。皆犬牙相制。錯雜不齊。應不惟其區。惟其方。圖其方。圓曲直及四至水道之所經。其或縱橫長僅一圩。而利可及於眾人者。亦復載明。俾爲人所共知。雖欲專之。而衆莫能犯。范文正公有水利圖敘。圖則弗傳。而敘之所言。皆捍災救患之事。所當取法者也。吳縣置域圖說。按各省水道圖說詳載會典及各省方志。櫟又言水性就下。因而導之。則順而其爲力也易。激

而行之則逆而其爲力也難。故伍田則惟築隄岸。浚塘浦。而其於高田。旣設堰。潴水灌溉之。而又浚其經界溝洫。使水道流通。夫然後立壩門以防其壅。斯可以免枯旱之患。

皇朝經世文編

凡圩田內外橫塘

直浦。歲宜修浚。大抵不論低田高田。俱以十分爲率。低田以一分爲隄岸。高田以一分爲溝池。可以永無水淹。後人不知古人灌田固田之意。乃謂其所以闢深塘浦者。爲決洩積水。於是僅擇其大者治之。其差小者便不浚治。以至水勢不分。大塘大浦不能洩水。

而田防益壞。其應修圩岸。該管值年。量田高下。督圩戶各就田頭修築。不論有田多寡。但以田頭闊狹爲則。如田頭闊五丈者。修岸五丈。闊十丈者。修岸十丈。或有逃亡之戶。田頭溝頭共修之。其圩心田戶。若有經塍者。自修其塍。無經塍者。與眾同修。各管其圩。則各修其岸。其不修者。罪坐值年。抗不出力者。官司懲治。

姚文濬修築圩岸事宜議

查民間各就其地以施功。相習已久。蓋田溝固有業主。卽路溝亦緊與民田相傍。其修濬爲農田之利。民亦易曉。惟勤惰不一。眾

力難齊。必得官爲督率。令溝頭渠長就田出夫通力

合作。而不假胥吏以預其事。自屬樂從。

胡寶琛田溝

路溝論

語曰。人力足。災爲福。故凡營治水田者。莫先

於固隄岸。固隄岸在齊民力。民力齊。厚其力食。而隄

岸固矣。

韓夢周圩田圖說  
此條論東南水利

**又**北人水旱聽命於天。使近河之民。效南方水車以  
掣之。而又分區築港。可以流通。未必不爲利也。其去  
河遠者。每田百畝。四隅及中爲穿一井。每井可灌二  
十畝。四圍築以長溝。旱則汲井灌田。潦則放水入溝。

亦庶幾有備

河南志

今直隸山陝至高之所但田間

有井一口。此畝之價比他畝更增多。至所收比他畝

較多數倍。而况有支港經流。閘座蓄洩之所乎。

乾隆

三十年興修水利議

堰水灌田。須分地之高下廣狹

量水之遠近大小。定以時刻次第灌漑。仿召信臣均

水之約。刻石田畔以息爭端。

南陽水利說

近山之地

山水漲發。一瀉無餘。宜築堰開渠以資蓄洩。多開小

溝。則水散而流通。不能爲害。北人徒貪多種。又情於

施工。若令十畝之地留一畝以備九畝之水旱。非其



所願間有水塘不勤加修築久亦淤渴亦養民者所當講求而利導者也。胡遠謨水利說

又西北之地旱則赤地千里潦則洪波萬頃惟雨暘時若庶樂歲無飢此豈可常恃哉水利興而後旱潦有備利一以國家之全盛獨待哺於東南豈計之得哉水利興則餘糧棲畝皆倉箱之積利二東南轉輸其費數倍若西北有一石之入則東南省數石之輸利三西北無溝洫故河水橫流而民居多沒興水利則可分河流殺水患利四南賦煩而役減北賦省而

役重使田墾而民聚則賦增而北役可減利五

本十  
四條

今錄  
五條

萬厯三十年以御史蘇瓚等薦進徐貞明少卿

領墾田使有司撓玩者劾治之先詣永平墾田三萬  
九千餘畝將大行疏濬而閩人勦賊之佔田者爭爲  
蜚語王之棟家畿輔陳不便者十二遂停役先是吳  
人伍袁萃謂貞明曰北人懼南漕儲派於西北煩言  
必起矣竟如其言

徐貞明潞水客談

趙一清書徐

貞明遺事

**又**仿虞集京東水利之議則北起遼海南濱青齊皆

良田也。其他山之泉，地中之水，所在皆有。誠使水無餘利，行之十年，歲可得穀千萬石。而山東、山西、陝西皆可度地，次第舉行。使西北之水利既行，則東南之漕粟可減。此誠萬世之利也。或謂種植之產，南北異宜。此則未明治水之要者也。夫將有所取，必先有所棄。故欲興水利於西北，當先規度地勢，棄最下之田，蠲其常稅，澮爲陂澤，而田閒廣，開溝洫，使潦有所洩，旱有所資。是一時一邑之所蠲有數，而其餘所墾之地，其利無涯。至去水稍遠，其土性所宜植者，仍聽之。

於民則地力自無不盡矣。

陳黃中京東水利議上二條論西北水利之益以

又種稻必資雨澤。東南春夏多雨。播種栽秧。可以按節而作。西北地皆平坦。春夏少雨。栽插難以及時。一不便。秔稻常須水養。非如雜糧。只須土潤。便能發生。東南土性堅實。隨處可以開塘蓄水。西北沙土浮鬆。水易滲漏。卽鑿深池。水可不漏。一遇大雨。泥沙隨下。塘易淤淺。愚民以挑浚爲苦。二不便。北人不願食稻。卽不願種稻。卽用南人教之。而心非所樂。則學亦不精。其收必不稔。彼覺勞苦數倍。而收穫不如雜糧之

多則精神易倦。三不便。水田必須牛耕。非如陸地可兼用驢馬。北方水草不便。蓄牛較難。價值亦貴。一有倒斃。舉家怨官司之苦。以所難。四不便。水田農具。多與陸地異。購買較難。卽起南匠往造。其頻頻修理。匠作難求。且因此遲悞已多。其心志不周。五不便。本六條。今錄其然西北本帝王溝洫之區。或古今情形不同。水利之屢興屢廢。其在斯乎。居今日而欲於北方盡復溝洫。其勢不能。惟疏通川澤。以除民害。則地無分南北。時無論古今。皆在所當行。徐貞明有云。西北之人

苦水害而不知水利。水之在天壤本以利人。非以害人也。聚之則害。散之則利。棄之則害。收之則利。此則不刊之論。程含章山石集此條論西北水利之難。

又遣官循行其地。度其高下。因宜制便。其低窪不可耕作。及原舊近水之處。或爲堰以蓄水。或爲隄以限水。不惟無乾旱之虞。且以收芟蒲之利。大學衍義補

又凡一省大局。逐一核計。何處高亢。何處低窪。高亢者宜陂宜堰。低窪者宜溝宜港。何處土脈鬆潤。可作水田。何處水土疏粗。但仍舊質。何處古跡可循。宜加

修復何處新流可引。宜與經營相度採訪勒爲一冊。留之本省。轉飭司牧以身率下。以義勤民。勿以抑勒爲能。勿以邀功苛督。至於平原曠野無水原可導者。酌其物土之宜。教民以布其利。乾隆二十三年會議

吳鵬南水利農田疏

又有司能體國家愛民之盛心。以足民爲先務。以升科爲後計。則莫重於興水利矣。山高水遠開渠截壩。動費不貲。民幾何能荷茲鉅任。此間田曠土多。委之於荆莽而不能以盡墾也。惟飭行各郡實心清查。

有無可以開渠截堰足灌民田若干。具詳覆勘其大者爲民請帑其小者勸里中賢豪長者照依樂善好施之例優獎之。地方官實力奉行受上賞。疏懈者紀其過。匿不以告者。罰無貸。水利旣興。開墾自易。誰甘棄其利而不爲者。

潘文茂黔省開墾足食議

令各府

州縣將境內四鄉山川邱壑暨志書所載有名水利區別山田圩田山田之塘堰溝渠或舊有而淤塞應濬或本無而開鑿可通圩田之隄埂畎澮何處當水之衝何處承水之流何處卑窪何處侵削應作何修



則辨其土宜經其樹藝繪圖貼說具冊詳覈分別緩急先後次第勸行省耕省斂府州縣親歷其鄉務在  
以爲利導毋爲矯民以自誣有無成效上官輕則  
紀其功過重則爲薦爲劾以定考成將見長吏之趨  
向專民生之本計厚矣

晏斯盛論農田水利書

水利

同知同爲虛設其於民本非疾痛相關民亦未能指  
臂相使歲修本屬虛文歲費斷難減少鑠冰畫脂殊  
爲無益

嘉定水利志以  
上三條水利考成

營田輯要內篇上之下終

營田輯要內篇下

貴筑黃輔辰述

立法之始國受其益民受其賜及其敝也非破法以逞其私卽沿法而巧匿其術故弊因法生不能不歸咎於法也鼠鼯雀啄其智短淺其腹易盈君子無容心焉若夫壞法亂紀作姦僞而毒生靈烏能不釐剔而預防乎子夏曰凡姦者行久而成積積成而力多善持勢者早絕姦之萌輯積弊

不清其源之弊

患之尤甚而當事有未慮及者。各郡縣人丁之逃亡。地土之荒廢。均應查明申報。應蠲者請蠲。雖經申報而蠲免之令未下。則逃亡之人已無。而名未去。籍荒蕪之地全虛。而課仍入。則今將廣行招墾。彼死者無論矣。如逃者欲歸。而數年之逋并責。族黨之賦代賠。如荒者欲開。而前此之荒糧未除。後此之田租重納。小民安能支此數困哉。愚謂必除荒而後荒可開。必免逃而後逃不復。此尤招撫開墾之一大機權也。盧

紘屯田議

**又**知弊之宜革而所作兼失其源知簡之可從而所操不得其要舊患雖減新沴復滋救跛成痿展轉增劇凡欲拯其積弊須窮致弊之由時弊則但理其時法弊則全革其法而又揆新校舊慮遠圖難規略未詳悉固不果行利害非相懸固不苟變所爲必當其悔乃亡若好革而不知原始要終斯皆以弊易弊者也。翰苑集中書奏議

**又**一人之心力有限羣姦之欺弊無窮盡挾其弊以別真僞其勢有所不能矧積重難返之日一旦欲掃

除而更張之。未有不至於擾民者。孟子有言。蓋亦反其本矣。意者今日之弊。亦當先端其本乎。使有司無侵刻之擾。愚賤有樂從之勢。則諸弊一掃而去矣。儲方慶荒田議 黃震孫限田論 王文恪公文集

不務其實之弊

明道先生有言。天下之士。須才與至誠合一。方能有濟。一程全書 著令甲者。凡以示天下萬世。最不可草

率。草率則行時必有滯礙。最不可含糊。含糊則行者得以舞文。最不可疏漏。疏漏則出於吾令之外者。無

以憑籍而行者得以專擅。

呻吟語

又天下不可使無好名之心。好其實故不得不獨好其名。因名以責實。故不得不使天下好名。然其始特不可有自好其名之心。自好其名。則直以爲名焉已耳。欲治其實以治天下。不可得也。

好名論

又天下之大弊。在名實之不覈。上之所以求乎下者。未嘗不以實也。而下乃有冒美其名以應乎上者。又恃其名掩覆粉飾於外。而內緣以爲姦。卽苟有詰責。猶得持空名以相拒。此天下所以寢寢日趨於虛假。

潰敗而不覺也

張海珊送張少淵試禮部序

又呂祖謙曰當官處事但務著實亦事君不欺之道也百種姦僞不如一實反復變詐不如慎始防人疑眾不如自慎不易之道也

御纂性理精義

又凡事一以真意交孚雖欲稍自退諉而心有所不安稍爲欺隱而心有所不忍夫然後利有舉而必興害有除而必去

秦蕙田講義

又賢者所圖蓋事已立而跡不見功已成而人不知

蘇文忠公文集

又能有爲者。豈獨其幹濟優。必器量廣。無急急之意。無切切之容。惟植本濬源。則柯長流遠。真實無妄。非欲速見小者所可同日語也。楊名時程功錄

又或亟欲見好以邀功。或但求無事以免過。無而爲有。虛而爲盈。徒然紙上空談。並未身親其事。上司更不加察。同人因之效尤。此皆不可以有爲者矣。

皇朝經世文編

又目前吏治。患在有名無實。有初鮮終。講理必透其根源。遇事必求其實在。地方官謹飭有餘。親切不



足所以事皆不可爲而民生卒無所賴也。人之心  
思物力祇有此數於浮文多一分卽於實事上少一  
分。民所切望於官而官不知之官民情意不通雖  
法良意美行之難免滋弊甚至因一偶有之弊而廢  
經久當行之法皆官司苟安自便奉行不實之故。陳  
文恭公手札節要

輕委之弊

上官常好別遣幹吏使者銜命奔走旁午於道所至  
徒有煩擾之弊而於事未必有益不若勿遣而責成

於郡縣之爲愈也。夫事之利害更之能否。皆非使者所能素知。且恐擾亂其閒。使不得行其職。又庸人之情。苟策非已出。則媚嫉沮懷。惟恐其成。借使使者有所規畫。其當職人已怏怏不悅。不肯同心以助其謀。協力以成其事。其返命之日。彼必敗之於後。而事以言廢。此所以不若勿遣使者之爲愈也。司馬文正公

集上體要疏

又凡應勘之州縣。委員不可不慎。乘傳絡繹地方官。舟車與馬酒食供帳之費。不貲家人吏役。尤復種種。

需索前起始去。後起復來。凡委勘尤急之區。必被害較深之地。民不堪命。官亦無聊。一有不周。波瀾頓起。雖有賢令。免過未能。是誠在爲之上者。體籌於至微也。  
皇朝經世文編

又循良罕覩。皇皇者華。遵周道而馳驅者。豈所謂詢疾苦之意耶。  
魏裔介請停察荒疏

又使人不量其器。與人不由其誠。不思其所不及。不恕其所不能。是以事無成功。謀始之際。不立定規。分遣從官。專行其意。遂使人殊見道異法。低昂不類。

緩急不倫。亟繚勞絲。重傷宿痼。其爲擾病。抑又甚焉。  
刻吝則生患。寬假則容姦。苟非其人。不可輕授。韓

苑集

又政之不善者。厲民以利國。而其旣也。國無所利。而  
因以爲害。唯以不善故爲君子所爭。乃任小人以成  
其事。則小人乘以播弄。而其禍乃延。故曰。亂天下者  
非亂法。亂之亂人亂之也。可不慎哉。王夫之宋論

推諉之弊

創行之始。地方官親赴各鄉。僕從輿馬。不無煩費。流

民應募承領稽察繁多。委員查驗又須酬應供帳。且未墾之前。逃者不歸。既墾之後。民無固志。荒者未墾。墾者復荒。墾而不報。姦人起而訐之。報則民畏累而復遁。事多棘手。勢必勞心。則何妨以尺紙片言。化爲烏有。雖哀鴻徧野。勿顧也。此固賢者所不爲。亦上官之不爲。體察也。

荒田議

高州丈荒議

**又**經界旣行。安得盡無弊。只是十分弊也。須革去八九分。所餘者一分半分而已。今人卻情願受這十分重弊。及至纔有一人理會起來。便去搜剔那一分半

分底弊來瑕疵之以諉爲決不可行。如被人少卻百貫十貫。卻不管及被人少卻百錢千錢。便反要與理會。今人都是這般見識。無人肯把國事做成家事看。

朱子語錄

**又**州縣所掌畫者。其精神專以應酬迎合爲要務。至於民之痛癢。絕不相干。上官或以虛文責之。則亦以虛文應之。若必徵其實效。則多方組織其弊。以爲決不可行。轉矜爲周詳之思慮。如上官不惑於羣議。斷而行符。旦下而夕除其弊。亦無不舉矣。王文恪公文

集 何道生陳新政四事疏

**又**夫爲政不欲過碎。碎則人煩。勸課亦不容太簡。簡則人怠。善爲政者。必消息時宜。而適於煩簡之中。故詩曰。不剛不柔。布政優優。百祿是求。如不能爾。委靡情慢。而令人廢農業。是則絕人之命。驅以就死。則必陷於刑辟矣。蘇紳傳

勘丈之弊

雍正八年十月

諭向因四川地畝隱匿甚多。以致姦滑之徒乘其疆界

不清契券無據侵陵攘奪告訐不休種種弊端不可枚舉。此天下臣民所共知者。是以數年以來。內外諸臣奏請清丈者不下數十人。蓋以田畝隱匿不但無益於國課。亦且有害於民風。朕再四思維。始遣科臣高維新等前往四川省料理清丈之事。期於公當均平。無偏無刻。及丈量之事將竣。又頒諭旨。若有額糧稍重之州縣。卽比照就近適中之科則令其核減。以紓民力。蓋地多糧少者則當按則增加。而地少糧多者則當查明減免。此朕之本意。屢曉諭該省巡撫及



辦事諸臣俾各悉心奉行者也。近聞該省州縣中有地少糧多之處。歷來地方官勉強加增者。此番清丈並未核減。著巡撫憲德轉飭布政使高維新等再加確查。細心斟酌。若有糧賦稍重處。卽據實奏請核減。毋得固執已見。回護從前。有負朕均賦恤民之至意。

又丈量初意。止期均賦。非欲增賦也。奉行太過。悉求增以爲功。然圍田日久。漸開。覆行弓步。未有不加多者。山場溝蕩。悉以爲田。增額過多。官行其私。吏恣其弊。所加之額。全不在公矣。故畏法者取盈。虛文仍有

賦而無田。巧法者陰縮加額。終有田而無賦。且西北之田視之雖衍沙瘠難肥。況其高者。東南之田視之雖下。土饒易糞。況其平者。至山林時墾咫尺荒闕未足深據。尤當少爲劑量焉。

唐鶴徵丈墾論

東南地勢險狹。與西北地勢平衍廣闊者不同。東南山岡之田多。平坂之田少。平田畝雖多而邱數少。山田畝雖少而邱數多。計折一畝田大者或二三邱。小者或八九邱。至十邱故造冊之煩較西北爲甚。其紙割刷印筆墨雇募鈔寫磨算及水陸解扛卷冊之

費不貲。一邑如此。一府可知。而通省之費更可知。萬一差譌。必干駁詰。文移往復。勢必稽遲。若憑此以爲抽查。紙上何從查核。卽按臨各屬履畝。亦斷無輦載冊籍以從之事。此等具文。其所費未必不波及於民也。則何如以邱段之細數存縣。田畝之總數申上。爲直截簡要耳。

姚文然丈冊末議

**文**已墾之田。非有事故。不可清丈。愚民易惑。初聞清丈。已覺倉皇。旣見官差。尤生畏懼。姦胥因乘機嚇詐。倡爲加賦之言。臨丈之時。高下任意。有賄者將多報。

少兼有姦猾鄉里串通書役攤派夫馬酒食冊籍紙張各名目按畝需索共飽私囊其於未丈之先故於旬日之前追集各村之民守候無期以致廢時失業卽有賢員事後覺察而問閭之受累已深矣貴陽府志包祚永丈量滋弊疏

又田地有必須勘丈者必務嚴密是故重欺隱之罪以防姦宄嚴扶同之禁以防賄買分荒熟之實以防混淆定步弓之度以防短長謹丈冊之藏以防洗改躬抽段之覈以防蒙混申覆丈之例以防怙終此七

防皆所以爲嚴密不嚴不密民不畏服其弊百出諸  
城縣丈田論

姦民猾吏之弊

姦民欲計免其賦役割數畝之地加之以數倍之賦而少收其直或者亦貪其直之微而取焉是以兼并之族賦甚輕貧弱之家而不免於賦役之重至於破敗流移而不知其所往夫天下不可以有僥倖也天下有一人焉僥倖而免則必有一人焉不幸而受其弊今天下僥倖者如此之眾則其不幸而受弊者從

可知矣

東坡文集

**又**百姓浮糧有私收於姦民胥吏之手者其受田之初邱畝有定或有近田間土水漂沙壓山麓蹊壑之地填夷挑補隨宜補植此本民力自勤鄰近姦民因以私墾索求勾通胥吏借端興訟平民畏累歲出私租官司訪問不爲開豁更或因以爲利是導民以情不得咎地之不克廣也

明季尙寶書

**又**士民之姦詭有甚於吏胥者一夫受田止許一分若一人而冒數人之田則佔種私典私鬻之弊叢生

故富者阡陌相連。貧者終無立錫之地。至勢強力厚。官且與以爲緣。其法弊壞已極。今欲根尋原業。使冒墾者悉令退還。另募人承種。非饒有才力。而又假以事權。遲以歲月。不克就。談何容易。

贛州府屯田議

**又**昔張鑑論田賦之議。莫大於飛洒。詭寄虛懸。其飛洒也。富人多田。昭書洒升。合於他田。歲倍增之。積久而加多。被洒之家。昧無所省。至終歲傭輸。猶有不治其詭寄也。田多者恐役重。詭寄於鄉官。吏承。暨貧戶下。則文武職之寄莊。而仍不出於本邑之內。巧爲隱

託而以隣爲壑其虛懸也甲有田而推於乙乙推於丙丙推於丁而復推於木戶改多改少展轉錯綜無從根究又或捏報坍塌以實爲虛久而田糧俱沒然飛洒者損人以裕己詭寄者避重而就輕至於虛懸則上負國矣其諸弊又有以應豁之田洒合勾於里戶而潛收其利則有影射之弊侵收之田以一埋十捏入公田之內則有那移之弊買田十而止開八九仍遺一二於賣戶更或收田而不收糧則有買主偷減害留賣主之弊買戶既收其田賣戶不與之除



則一田而兩稅。甲田旣洒於散戶。而以應豁者補之。則無田而有稅。是爲乾沒之弊。田本輕則。故開重則。田本八九。而多開爲十。買主糧加。賣主糧減。則有潛移之弊。小戶併於大戶。熟田假爲荒田。以有爲無。以實爲虛。是爲欺罔之弊。凡此不可殫述。而皆出於猾吏之手。不可不知。

浙江田賦書

又姦民匿荒田爲攘利之窟。其實業荒者。或以盤剝。或以磽瘠。逃亡遷徙。不能自達於長吏之前。今日清荒以破姦民之利。姦民旣懼其敗利。又畏發其姦。每

創爲利害之說以震恐業荒之民。使之不敢自言其荒。而因得匿於混淆莫辨之內。故夫業荒之民無力之民也。冒荒之民有力之民也。一二有力之姦民。可以愚千百無力之窮民。而並以愚夫不知弊之上官。嗚呼。欲官不受其愚耶。不亦難乎。愚以爲姦民之所恃。在縣官不能履畝耳。則欲破姦民之恃。窮極其情。而使之無遁形。莫先於核實。莫急於不憚煩。儲方慶

荒田議

又姦民積年出沒其中。輕重局下在其手。或詭寄於

官宦或分散於各戶民與吏互相爲姦有司拱手聽其所爲而不去非不欲去不能去也其弊起於則數之細碎故也。王文恪公文集

**又**議者率曰吹求太急民且逃亡爲亂夫民之亡且亂者貪吏剝削而上不加察豪民兼并滑吏行私而窮黎失所故也今爲清其源隱侵占則小民免包賠而得守其本業何以逃亡爲觀古今治亂興衰之故曾有官清民安田賦均平而致亂者乎。張太岳集

**又**大抵詭寄賄買之弊繫乎令長之彊察與否花分

移甲之弊。則係乎冊籍之精核與否。法無全利亦無全害。不就法中調停損益。驟欲變之。以收一時之效。而不知小民已受其病矣。

唐順之答王儀書

### 里長糧差之弊

十甲設里。以里長經其十甲。並畸零小戶之糧。以民代役。可免糧役之擾。法至善也。然彼挾里長之重。抑勒索求。數倍於役。恐未已也。小民畏役如虎。故亦甘爲魚肉。曾不敢望齒於僕隸。強弱相陵。何所不至。唐鶴徵審編論

又里甲之冊由來已久其中混淆之情弊實百出若不徹底澄清其開戶口之多寡地土之肥瘠皆得上下其手凡作弊者惟至貧之戶至弱之民受害至深其情不能上達至不得已而逋逃則相謂爲姦僞官亦視爲不安本分之民則賤之惡之而不諒其輕去其鄉之何以故故欲使民克安其居克樂其業必先自里甲焉

朱澤雲林正佑田賦論

又自前代無所謂糧長者洪武初患有司之刻民擇有行義者理其事最爲良法昔之爲是役者未見其

患頃者朝廷之征求既多有司之侵牟滋甚公務有急則取之私家有需則取之往來供億則取之而又  
有常費之輸公堂之費官之百需多取於長長又安  
能不多取於民督責如火上下相承此民之所以重  
困也。王文恪公答李司空書

**又**通賦不清有自來矣試舉漕耗言之明萬歷閒漕  
規每正耗百石加民耗八石四斗後乃加至二三十  
石矣此外踢斛淋尖層層有贈則不啻三四十石矣  
而綱司話會之費通關小票篩籬銷算之費酒飯之

費盡出於民而輕賫短運夫腳之費不與焉計石米  
民費四倍完納自不能前勢不得不暫救目前之急  
買求寬限胥役知其無策需索愈甚雖嚴追侵欠猶  
鑽朽木木盡而火不出亦何益哉

張宸商屯議

民間

納釋胥役勒指需索且令守候無期有司豈不知之  
而不究問夫小民之不願與官從事者懼其層層剝  
削甚於姦民之盤剝耳果能體卹民艱諸弊杜絕彼  
何苦棄間井而思遠避哉

胡蛟齡廣開荒疏

蔡息關

曰北屯急在勸耕南屯急在清獎欲勸民耕不先清

弊不可得而興矣。

屯田總論

### 賞田官田之弊

明季每遇催科戶頭報完之日。賞荒田二三畝。責令開墾。三年後納租。司田務者亦各有官田。由是有勒令捏報開墾者。率有租而無地。積久而戶戶皆有有租無地之累。是賞地有其名。而實以害民也。堂邑志

官田者官代田附。非永業也。唐憲宗末。天下營田官田皆雇民或借庸以耕。恆以瘠田易人上田。民鬬苦之。穆宗時詔還各所易地而耕。宋宣和間。令諸買官



田者免納稅契錢。彭合言：州縣買官田之害，望減價。無抑勒。諫議大夫何溥言：比議體卹，令官田減價二分承買，而後謂其低價買，增價賣，諸般刻削。夫始憐其失業而爲之減價，終設爲增價之說，而開其爭端。望明詔改正。政和間，中官楊戩以地可墾爲稻田者，易名公田，皆內侍主之。所括凡得田三萬四千三百餘頃。農畝困敗，但輸公田，而正稅不復有輸。後李彥文悉主之，而專其稅。靖康初，誅彥文。均見文獻通考

**又**侵隱之習已非一朝。逃田多歸營田里長包贖，稍

久則以畸零之田爲荒田作正抵數而原額遂失其盜賣者始將不成片段相去避遠之田私典於人久則直爲已物立券賣之雖半價且甘心焉或姑留少許以備稽查或諉爲隣田以遂其乾沒而原額因以日耗此固不難曉而因循不察者何哉則以官田故耳故官不可以有田

洪武間屯田弊

**又**屯田人等將田典賣與人條例俱發邊遠充軍夫典賣尙不可若因墾地未廣將民田挖廢或侵冒民田以爲新墾此又律所未載之大罪也

潛邱劄記

捏報墾荒之弊

各省可墾之地甚多奉行未善流弊有二。一曰以熟作荒州縣承望上意並未履勘預報新開畝數以邀急公之名逮明知荒地之不足卽責之現在熟田以符其額小民畏官俯首以聽以爲不急升科未知遠慮夫使地有贏餘亦當留爲不盡之利若別無贏餘豈可履畝而益之哉。一曰以荒作熟歷年荒地。在河壩者坍塌不常。且地勢窪下。易於沮洳。在山麓者土薄而石多。禾稼難以發生。在高阜者水遠而灌溉不

能取便此等地畝。不爲親身踏勘。悉入報墾。貧民止  
貪目前之牛種資糧。草舍以餬旦夕。而有所栖止。數  
年之後。不得不報升科。幸有薄收。完日不足。稍遇歉  
歲。不能不慮其逃亡。以避追呼。然糧額已定。官有考  
成。則飛灑均攤。賠補之弊。從此起矣。是名爲開墾。究  
無開墾之實。徒以累民也。曹一士請核實開荒疏

### 私售營田之弊

唐有天下。定爲口分。永業之制。口分卽露田也。夫四  
十畝。永業卽世業也。夫家受而不還。皆二十畝。所以

課蒔桑麻也。貧不得鬻富不得兼。猶懼不能守吾法而乃聽民自鬻。是以小惠而亂大法也。其弊有不勝言者矣。明文在胡翰井牧論

**又**估價令民得收買。良非善策。買產之家無非大姓。估價之初。以上色之產。輕立價買。揭榜之後。率先投狀。今之已賣者。是也。若中下之產。無人計屬。所立之價。輕重不均。今之無人承買者。是也。文獻通考

**又**夫私鬻其田者。必窮迫之人。而所從鬻者。必富厚有餘之家。富者恃其有餘而邀之。貧者迫於飢寒而

欲其速售是故多取其地而少入其賦有田者方其窮困之中苟可以緩一時之急則不暇計其他日之利害故富者地益而賦不加多貧者地削而賦不加少此產去賦存之患也

東坡文集

**又**明制一軍一餘各受田而耕毋許私售然久則半居市廛不能親操耒耜於是有寄佃於人而收其息者有抵借他姓而更其名者有名存而田質於人者有田存而主易其名者有田售於豪右而身應賦役者若俟田盡民逃徒取之豪右則彼原以厚值得之

管日車要 內篇一  
轉滋爭訟。其咎在不能立法稽察。爲左右所欺弊。則負固而不能改矣。  
福建屯田議

又一區之內。咫尺之間。或爲舊田。或爲新田。新田價輕。舊田價重。糧賦輕重因之。貧者利價之重。僞以新田爲舊田。富者利賦之輕。甘受其僞。久之新田多歸於豪右。而仍有舊田之名。舊田不及於貧民。而尙存新田之界。則散而之四方。以逃其稅。稅無所出。則攤之里甲。里甲坐困。去住相牽。同入於困而已。  
王文恪

土客不安之弊

人性與風土相合則安其居。不合則僨其俗而去。流民墾荒。必與土著之民錯壤而處。土著者狹有餘之勢。以虐使流民。流民懷攘利之心。以陰伺土著其弊也。弱者屈伏而受其害。強者忿起而與爲難。流民不安。土著亦不安。君子處事。慮其萬全。利害未來。權其輕重。調劑於彼此之宜。以求安民利民之實效。職在是矣。儲方慶飢民墾荒議

田賦不均之弊



兼并者非豪民之鉗貧民而強奪之也。賦重而無等役煩而無藝於是均一賦也。豪民輸之而輕弱民輸之而重均一役也。豪民應之而易弱民應之而難。於是豪民無所畏於多田而利有餘弱民苦於僅有之田而害不能去。有司之鞭笞吏胥之挫辱迫於焚溺自樂輸其田而若代爲之受病雖有經界而無法守苦樂不均不能域之也。宋論

**又**按田定賦準賦定役原有不易之制而往往多寡不齊致爲民害其故可推知也。黠書詭竒豪右串通

玩法久而負固深。愚民不見長官。聽其播弄。積久而苦累。終不能上達。此非上官清心寡欲。博訪嚴察。民未均沾恩澤也。

鳳翔田賦志

又投田之初。其高下肥瘠長短廣狹。有無水旱之虞。既未明晰。有從前所謂上地中地者。或因派糧倒置。或因沙水變通。亦未深考。又惑於訛言。輕定等則。鹵莽從事。以了目前。去任之後。留爲民害。前官如此。後官因之。各圖便安。害將胡底。所謂官耐一時之煩。民受無窮之福。一念之疏。而亦貽無窮之累也。果其經

界分明田疇廣闊同其憂患曲爲生成保護既周全  
沾甚重是爲真正循良

皇朝經世文編

劉淇賦

役論 蔡毓榮實政疏

又均融處置務盡事宜就於所管之中輕重不得偏  
并雖未齊一不甚低昂既不擾人且不變法粗均勞  
逸足救凋殘若務輕費而樂轉徙者恆脫於稅役敦  
本業而樹居產者每困於誅求此乃誘之爲姦力用  
不得不弛閭井不得不殘也

均見翰苑集

喜事畏事之弊

詩云不愆不忘率由舊章。孟子釋之以爲遵先王之法而過者未之有也。識微見遠之士。凡天下之士俗人情目所親覩。前代之善敗得失耳所熟聞。弊不十不輕易舊章。轉滋多弊。剛而不愎。實而若虛。斟酌時宜。但求有濟。則無妄譚策略喜事紛更之弊矣。嶺南

集

夫法簡則事省事省則易辦。易辦則吏胥可減。吏

胥減則擾民者少。

楊於果上王觀察書

近世論治動

謂主嚴主寬。主則不免於偏。常至積重難輓。矯枉過正。所謂寬而有制。嚴而不苛者。乃是一意公平。實事

求是胸中並無寬嚴之見者存也

陳宏謀寄桐城張

相國書

湯火遺黎。斃斃待斃。不爲補救之謀。鋪張揚

厲。希圖掩飾。目前則所謂闢榛蕪謀生聚者。皆屬虛文。誠使加意招徠。多方撫卹。更生之民。得安其生。釐剔無名之誅求。永除額外之苛斂。推誠心以行實政。安得謂熙攘之風不可復見耶

蔡毓榮實政疏

又國之大弊。在於改弦易轍。法令繁多。令多則上官拘於成例。事事駁查。有司惟以功令自畏。救過不遑。安能計及於民之休戚。且叢迫之際。左右易以爲姦。

則民生愈受其病故法愈多而弊愈滋也盧崇俊法

令應歸簡易疏

前人立法不能詳究事勢豫爲變通之地後人承其已弊不能更革而復多立法以救之於是法愈繁而弊愈多故立法以救法而終不善者也日知錄

又循文法避指摘之庸材無必進之情無必退之心苟求無過以偷旦夕之安始容之終以靡之則求其擴心振氣以實出而有所爲庸詎能乎宋論世道既衰上不能無疑於下下亦不能無疑於上於是事之

有例者非例不敢爲也其無例者以他事之例例之亦非例不敢爲也令之所當避嫌者固不敢不避矣卽非令之所當避者亦一切避之何則天下明毅之人少而庸懦之人多二事不利於明毅之人而最利於庸懦之夫夫不循例不避嫌而遇事奮發有補於國家者未必加賞而循例避嫌者雖逡巡畏縮未必得罪則何爲而不循例不避嫌哉

張士元名實論

又幷縣尉謝深甫言剛介者果於植立而或隣於太銳靜退簡默者寡有所合而或隣於立異故言未酬

而已。齟齬事未成而已挫失。於是乘時趨利之人專務身謀。習爲輒熟。畏避束手。因循苟且。年除歲遷。亦至通顯。一有緩急。莫堪倚仗。名臣奏議

期效太促。任人不專之弊

阡陌未成。而名已在籍。播種未熟。而吏已到門。擾之以弗靖。持之以太急。今日覈地。明日徵逋。此催科之甚也。糧增而欺隱者多。役煩而逃亡者眾。故有糧在而田不知其處者矣。有田在而人不知其處者矣。此擅役之甚也。或者疑墾荒無救目前。豈知墾荒之益。



三五年而效不見十餘年而大效見不猶愈於久病求艾不蓄終不可得者耶

廣治平略

又自古凡關國計民生人心風俗之事皆未可尅期有成其可以尅期成者多係粉飾耳目之事

陳宏謀

手札節要

又上官自恃公正過爲刻覈凡接見動加呵斥屬下震恐詢以公事不敢出聲其所應爲轉慮不獲夫上而氣先沮儻一概目之爲庸亦恐下情不通而所謂庸者非庸也

辛從益詳慎甄別疏

國韓持國嘗思在下者多欺程子曰欺有之有爲利而欺者固可罪有畏罪而欺者在所恕事有類於欺者在所察許氏衡曰賢者以公爲心不爲勢屈雖或接之以貌待之以禮而其所言不見信用有超然引去者益戒禹曰任賢勿貳貳之一言大禹猶當警後世宜何如哉程子曰夫圖任之道以慎擇爲本擇之不精故知之不明知之不明故信之不篤信之不篤故任之不專知不明則用之猶豫信不篤則人懷疑慮任不專則不得盡其能下行有司之事當之

者自知交不深而其勢輕動懷顧慮不肯自盡故蓄縮不敢有爲苟循幸以圖安耳

均見性理精義

**又**凡今之弊皆不精不久之故何則天下之賢者不可以多得幸而有一人焉不可久而去夫世之君子苟有志於天下而欲爲長遠之計者則其效不可以旦夕見也今期月不報政則以爲是無能爲者不待其成而去之而其翦然見稱於人者又以爲有功而去然則能與不能皆不能久也朝廷旣以汲汲而去之而其人亦莫不汲汲而求去夫吏胥者皆老於其

局長子孫於其中。以汲汲求去之人而御長子孫之  
吏。此其相去如主客之勢。宜其姦弊不得而去也。東  
坡文集

**又**王質論任人無責全材。一辭令之不當。一措置之  
不審。雖大智有所不免。銖稱寸量。則自公卿大夫下  
至丞尉。其破碎而不全者甚多。非可以一二數也。名  
臣奏議

**又**守令不能專職。或分寄於人。或悉入於官。事如蠅  
毛動。皆掣肘。欲究心於撫字。而催科迫之。欲盡力於

吏治而處分文法足以縛之故必寬其歲月一其事  
權而後有爲也法者足以束賢智之手足不足以防  
大姦之狡猾守令專制一方事無定軌理無合轍當  
得法外之意使從容以展布之然後可治繩英異於  
循途屈奇材於守跡遇事苛察其曷有濟

吳鉉因時

論八

又大兵之後降寇流亡務在實心招徠安插若非從  
長經理無所依賴強悍者復轉而爲盜老弱者不免  
轉徙流散終填溝壑今欲調養元氣惟有集流民而

廣開地畝塞除一切弊竇爲治本第一大件舍此不爲束手無策是坐視民生凋敝永無休息之期任斯職者先期得人而賢者憚於煩勞慮其滋擾不能盡其所爲大吏惟知慮始不暇圖終未能寬與期限緩其責成雖有養民之術而民終不得養矣

徐旭齡安

民疏

劉餘謨興屯議

儲方慶荒田議

又自來利弊言人人殊有言之可聽而按之實在情形有不可行者有目前小有不便而甫經施工未得究竟旋來指摘者非詳慎熟籌於先不能得其實在

利弊非堅忍力持於後亦不能觀成以收實效  
陳宏謀手札節要

營田輯要內篇下終